

TUSI TAIALA

MO LE PULEA MA LE VA'AIA LELEI O I'A MA
FIGOTA

O LE AFIO'AGA O

FASITOO - TAI

Iuni 04, 1998

SAUNIA:

Pule mamalu a Alii ma Faipule ma tagatanuu o le Afioga o Fasitoo-Tai ma le Lagolagosua a le Vaega o Faigafaiva o le Matagaluega o Faatoaga ma Faigafaiva.

FAASOLOGA

1. Upu Tomua	3.
2. Autu	3.
3. Faamatalaga e uiga i le Afioga	3.
4. Ituaiga Faigafaiva Taatele	4.
5. Tulafono faa-le-nuu e fesootai ma le siosiomaga o le gataifale o Fasitoo-Tai.	4.
6. Tapenaga o lenei Tusi Taiala	4.
6.1. Feiloaiga muamua ma le afioga	4.
6.2. Faatalatalanoaga ma vaega e tolu	5.
6.3. Komiti Faufautua o le Faasao	5.
6.4. Pasiaina o le Tusi Taiala	5.
6.5. Filifiliga o le Komiti o le Faasao	5.
7. Fuafuaga Faataatitia	5.
7.1. la faamalosi tulafono faa-le-nuu e faasaina ai faigafaiva le talafeagai.	6.
7.2. la faasaina le lafoai o lapisi i le sami ma le matafaga	7.
7.3. la faasaina faigafaiva mai isi afioga	8.
7.4. la faasaina iloilo ina le saogalemu i ogasami o Samoa mai meatau faaniukilia	8.
7.5. la aoina mai i uta alamea ma faatamaia ai	9.
7.6 la faasaina ona toe taina faaleagaina/taina totagoto	9.
7.7. la faasaina upega ma tili mataninii	10.
7.8. Faasao ina o se vaega o le gataifale (Ogasami Faasao ina)	11.
7.9. Ia faasalalauina tulafono a le afioga	12.
7.10 Ia faasaina Tuiga ma Faamo'a ma Saeuga	12.
7.11. Ia faasao ma faateleina amu	13.
7.12. Tufaina atu ma le faa-faatoagaina o i'a ma figota	13.
7.13. Ia faasaian le laueseina o le oneone	14.
7.14. Ia unaia faigafaiva i tuaau ma aoaoga mo faigafaiva	15.
7.15. Mana o Talosaga	16.
7.16. Talosaga a le Afioga	16.
8. Maliliega	16.
9. Upu Mulimuli	18.
10 Ituaiga o Faigafaiva e Faatino i aso uma	19.
11 I'a ma Figota	19
12. Sui o le Afioga sa auai i Faatalatalanoaga i vaega e tolu	20.
13. Komiti o le Faasao	21.
14. Sui o le Vaega o Faigafaiva	21

1. UPU TOMUA

O faigafaiva i gataifale o Samoa e taua tele mo le fofoga taumafa aemaise lava i afioaga i tua. I le tele o afioaga, latou te le o faatauaina le pulea tatau ma le vaaia lelei o punaoa ma le siosiomaga o le gataifale. O le faia ma le faaaogaina o ituaiga faigafaiva faa-onapo-nei e i ai mea manava, upega ma tili mataninii e faamata faigofie ai ma tele ai i'a maua ae o loo faaitiitia ai le tamaoaiga o le gataifale. O nisi o atinae ma galuega faatino ua faaleagaina ma faatamaia ai le tele o nofoaga ma meaola o le sami e pei o:-

- le tanumia o vaega o le gataifale, togatogo ma le talafatai mo eleele-fou (fanua);
- faigafaiva le talafeagai pei o fanai'a, ava niukini, vailaau oona ma faamo'a/tuiga.
- soona taina i lalo o laau i autafa o vaitafe ma vaomatua

O nei faafitauli o loo tulai mai pea i gataifale o si o tatou atunuu, ua matua faaitiitia ai i'a ma figota ae le gata i lea o aafiaga i mala faanatura e pei o galu malolosi faapea matagi ma afa ua tuanai e pei o Ofa 1990, Val 1991 ma Heta 2004.

O i'a ma figota o le sami sa faamoemoe iai le fofoga taumafa o tagata Samoa, ae ona o faafitauli pei ona taua ua faatamaia ma faaitiitia ai nei punaoa o le sami ua tele ina taugata ai, faapea le faamoemoe o tagata Samoa i meaai tuu'aisa ma meaai tuu'apa o lo o faatauina mai atunuu i fafo. O se atugaluga lea o lo o iai i le taimi nei ae le gata i lea o le faamoemoe tele i le tupe aua mea taumafa i aso uma.

O le polokalame o le faasaoina ma pulea tatauina o le gataifale o Samoa na amata mai e le Ofisa o Faigafaiva i le tausaga 1995 i le faatupega mai le Malo Ausetalia (AusAid) mo le lima tausaga. E faataua ai le fesootaiga ma le galulue soosoo tauau ma afioaga aua le faatuina o latou ogasami faasao. O tualumaga o le polokalame e aofia ai le soalaupuleina ma le fausiaina o se Tusi Taiala e tamauina ai fuafuaga faataatitia a le afioaga faapea le Ofisa o Faigafaiva.

O se tasi o autu taua o lenei polokalame o le toe tapu'e mai lea o tamaoaiga ma faaoga tatau punaoa o le gataifale ma le sami ina ia maua pea aua tupulaga lalovaoa o Samoa. O le puleaina ma le lelei o lenei polokalame faasao i nuu, e i lima ma aao o afioaga lava o lo o faaaogaina nei punaoa ma tamaoaiga.

O fuafuaga faataatitia i lenei Tusi Taiala e unaia ai le vaaia lelei aemaise le pulea ma le fuafua tatau o le faaaogaina o le tamaoaiga o le gataifale ma le siosiomaga o FASITOO-TAI.

2. AUTU

O le autu lenei sa faatalatalanoaina ma malilie autasi i ai vaega taitasi o le afioaga;

- 1. Ina ia puipuia le siosiomaga o le gataifale ma,**
- 2. Toe faatupulaia le tamaoiga o le gataifale mo tupulaga o le lumana'i**

3. FAAMATALAGA E UIGA I LE AFIOAGA

O le afioaga o Fasitoo-Tai e i le itu i saute i sasa'e o le motu o Upolu ma lona faitauaofai e tusa ma le 1,450-1,500 aofia ai matai, tina ma tamaitai, aumaga ma tamaiti. E le aofia ai i latou ua faimalaga atu i atunuu i fafo e i ai Niusila, Ausetalia ma le Iunaite Setete o Amerika.

O Fasitoo-Tai e i ai lona a'au e mai lava i le itu i sasae seia paia le itu i sisifo i le mamao pea ma le 700-800 mita. O le umi o le a'au e pea ma le 200-300 mita mai le matafaga. O le vaega pito loloto o le aloalo e tusa ma le 30 futu i taimi e sua ai le tai ae 30 futu nisi o vaega o le gataifale pea oo ina pe le tai.

O lenei afioaga e mamalu tele ona pulega. O le aumaga e lava saunia i taimi uma aua le tautuaina o matai, o tina latou te avatua fautuaga lelei mo ni mataupu tau lotoifale o le afioaga.

4. ITUAIGA FAIGAFAIVA TAATELE

E tele ituaiga faigafaiva e mafai ona faatinoina i le aloalo o le afioaga o Fasitoo-Tai. O nisi o nei ituaiga faigafaiva e i ai matatao, uaua malau (toso); ma le faaaogaina o upega (e tele ina faatinoina e alii) mo le fofoga taumafa a le aiga pe faatau foi. O le aoina ma le eliina o figota i luga o le aau o le galuega patino lava lea a tina ma le fanau mo taumafa a le aiga.

O le faatinoina o faigafaiva-le-talafeagai e i ai fanaia ma ava-niu-kini ua matua faasaina lava i lalo o le pulega mamalu a Alii ma Faipule. E tutusa lelei lava ma le faaaogaina o tane mauulu ma mea manava (scuba gears) i fagotaga ua matua faasaina lava ona toe faatinoina i gataifale o le afioaga.

O le tele o i'a sa maua i aso ua mavae ua faigata ona maua i aso nei. O i'a o le aloalo e i ai lo, poge ma alogo, anae ma mataleele sa tele ma faigofie ona maua i le 30 tausaga talu ai. E oo foi i figota e i ai le sisi, faisua faapea sea, loli, mamao ma fugafuga sa tele i aso ua mavae. I le taimi nei, o nei i'a ma figota ua pau maualalo le faitau aofai ma e tele ni itula e faaaluina mo fagotaga faatoa maua se meaai mo le aiga, pea faatusatusa i le 30 tausaga ua mavae.

5. TULAFONO FAA-LE-NUU E FESOOTAI MA LE SIOSIOMAGA O LE GATAIFALE O FASITOO-TAI

O Fasitoo-Tai e i ai ona tulafono i aso ua mavae e faasaina ai faigafaiva-le-talafeagai e pei o fanaia, ava-niu-kini, vailaau oona, lama moli-uila ma tane mauulu (scuba gears) ua matua faasaina ona toe vaaia.

Ua faasaina foi tagata mai isi afioaga ona toe fagotaina gataifale o lenei afioaga. E ui lava ina ua i ai tulafono e pei ona taua, e le o atoatoa lona faatinoina ma lona vaaia ona o le aloaia e au faifaiva mai isi afioaga. O le isi itu o le mamao lea i tai o nofoaga o loo faatinoina ai nei ituaiga o faigafaiva atoa ai ma auala o loo faaaogaina.

6. TAPENAGA O LENEI TUSI TAIALA

O lenei tapenaga sa saunia lava e alii ma faipule ma tagatanuu o Fasitoo-Tai faatasi ai ma ni fautuaga ma le lagolagosua a le Ofisa o Faigafaiva o le Matagaluega o Faatoaga ma Faigafaiva. O se ootoga lenei i le tapenaga o lenei Tusi Taiala ina ua maea ni fonotaga sa faia ua taua i lalo.

6.1 Feiloaiga Muamua ma le Afioaga.

I le amataga mai o le polokalame, sa faapea ona faatoai mai se finagalo o le Pule Mamalu a Alii ma Faipule i le Ofisa o Faigafaiva e faailoa ai lo latou fialia e auai i le Polokalame mo le Puipuiga o Gataifale. O le Aso 17 Aperila 1998 sa faia ai se feiloaiga muamua (fono) a le Ofisa ma le afioaga e faamalamalama ai le polokalame pe taliaina e le afioaga. O le fono foi lena sa auai ai le Faatonu Lagolago, Alii ma tamaitai Ofisa e taliaina aloaia ai se finagalo o le afioaga i lenei polokalame.

6.2 Faatalatalanoaga i Vaega e tolu.

O le taua o lenei faatalatalanoaga ina ia vaevaeina le afioaga i vaega e iai matai, tina ma le aumaga. O nei vaega e tolu sa faatalatalanoaina e sui o le Ofisa o Faigafaiva. O le autu tonu o nei faatalatalanoaga ina ia mafai e le afioaga ona faailoa mai faafitauli o loo aliae mai le siosiomaga o le gataifale o Fasitoo-Tai. Sa faapea foi ona sailia ai ma ni aafiaga ma ni mafuaaga o nei faafitauli. O ni fofu, faatinoga ma i latou e faatinoina nei fofu sa faailoa mai.

VAAIGA I LE TAIMI O FAATALATALANOAGA I VAEGA E TOLU

6.3 Komiti Faufautua o le Faasao:

O le matafaii o le komiti faufautua o le tuu-faatasia lea o faamaumaga ma faamatalaga mai vaega taitasi ma sa mafai ai ona latou tapenaina se ata faataitai o le Tusi Taiala.

TUSI TAIALA MA LE TAUAOFIAGA O LE FONU MULIMULI

6.4 Pasiaina o le Tusi Taiala.

O le faagasologa atoa o nei fuafuaga faataatitia a le afioaga e aofia ai foi ma fuafuaga faataatitia e lagolagosua mai ai le ofisa o faigafaiva.

O lenei Tusi Taiala sa tuuina aloaia i le fono a matai e sui o le komiti faufautua ma sui o le ofisa o faigafaiva mo le pasiaina ma amata faatino ai loa galuega ma matafaioi a vaega taitasi. O le fono foi lea e filifilia ai loa ma le Komiti o le Faasao e taitaia le faagaioiga o fuafuaga ua uma ona faataatitia.

6.5 Filifilia o le Komiti o le Faasao

O le komiti o le faasao sa filifilia mai i vaega taitasi i taimi o faatalatalanoaga, latou te mataituina fuafuaga faataatitia a le afioaga. E maea loa le pasiaina o le Tusi Taiala o le a faafesootai lava le ofisa ma le komiti i tulaga uma lava e manaomia ai le fesoasoani e pei ona autasi ma tamauina i le Taiala afioaga.

7. FUAFUAGA FAATAATITIA

O fuatuaga faataatitia o ni gaioga ua faamoemoe e faaono foia ai faafitauli ua faaalua ma faailoa mai e vaega eseese o le afioaga. E lua (2) ituaiga o fuafuaga, ma o le fuafuaga ua aupito sili ona taua o ;

- fuafuaga faataatitia a le nuu.

O le isi vaega o fuafuaga faataatitia o le ofisa o faigafaiva ma o nei fuafuaga o le tuuina atu o fautuaga ma fesoasoani i nisi auala e pei o aoaoga ma le tufatufaina o pepa o faamatalaga i mataupu e fesootai i le gataifale. O galuega uma lava e faatinoina e le ofisa o faigafaiva e ao ona faamaonia e le faatonu lagolago (Assitant Cheif Executive Officer) a le matagaluega o faatoaga ma faigafaiva.

I taimi o faatalatalanoaga i vaega taitasi, e tele ni mafuaaga sa faailoa mai ae auga lava i le faafitauli ogaoga o le faaititia lea o i'a ma figota i le aloalo ma auu o le afioaga o Fasitoo-Tai.

O mafuaaga ma o latou aafiaga i le siosiomaga o le gataifale sa faapea ona iloiloina ma sailia. O tali o faafitauli ma fofo poo auala e foia ai na iloiloina foi i faatalatalanoaga. E le gata i lea sa faailoa mai ai foi ma vaega latou te faatinoina nei galuega.

O le vaega i lalo o le a auiliiliina atu ai atoatoa fuafuaga faataatitia sa aoina mai i vaega taitasi ma tuufaatasia e le komiti faufautua ma le lagolagosua a le ofisa o faigafaiva.

Tulafono Autu Tau Faigafaiva (1988): O le tulafono a le Malo o Samoa e ;

(1) Faasaina o Faigafaiva-le-Talafeagai,

(2) Faamalosiaina ai le Laiseneina o Vaa-Fagota.

Tulafono Faatonutonu Mo Le Laiti Faatapulaaina mo I'a ma Figota (1995): O le tulafono lea e faatapulaaina ai le laiti o i'a ma figota, ma le fuaina o mata-upega.

Tulafono Laiti: O tulafono a le nuu ma afioaga ua amanaiaina e le Faamasinoga.

7.1 FAAMALOSIA TULAFONO FAA-LE-NUU E FAASAINA AI FAIGAFAlVA-LE TALAFEAGAI

Otootoga

Na faaalua e vaega taitasi i taimi o faatalatalanoaga o loo faaauauina pea le faaaogaina e faifaiva o fanai'a, ava niu kini ma vailaau oona i fagotaga. O nei faigafaiVa-le-talafeagai ua mautinoa lo latou tulaga ogaoga i le faatamaiaina o le siosiomaga o le gataifale, e pei o i'a laiti aemaise o nofoaga taua mo meaola o le sami e iai amu. O le faaleagaina o le gataifale mai nei ituaiga auala faa-faigafaiVa e umi ma tele se taimi e toe faafoi ai i le lelei sa i ai.

Fuafuaga faataatitia a le afioaga

Talu ai ona o le tulaga pagatia ua iai le gataifale o lenei nuu o Fasitoo-Tai o lea na ae ai se finagalo autasi i le komiti faufautua ina ia matua faamalosia tulafono a le afioaga e faasaina ai faigafaiVa-le-talafeagai e pei o fanaia, ava-niu-kini ma vailaau oona. O le puipuiga ma le faamamaluina o nei tulafono o le a i aao lava o le pule mamalu a ali'i ma faipule faatasi ai ma le lagolagosua a tagata nuu o le afioaga.

Fautuaga

Ia toe faamslosia ma fa'amamaluina tulafono ua taua i lalo a le afioaga mo le fa'asaina o faigafaiVa le talafeagai.

Tulafono

Mo le mamalu o le atunuu atoa ai ma tagatanuu o Fasitoo-Tai:

Ua tasi nei le tofa ma le faautaga i alii ma faipule o Fasitoo-Tai, ua matua faasaina lava faigafaiVa le falafeagaia e pei o fanai'a, ava niukini, ma vailaau oona i gataifale o le afioaga.

Faasalaga

Mo tagata o le afioaga e solia lenei tulafono, o le a faasalaina i le \$500.00.

O tagata mai isi afioaga o le a molia sao i le Tulafono Autu Tau FaigafaiVa ma le Tulafono Laiti a le ofisa o faigafaiVa.

Fuafuaga faataatitia a le ofisa o faigafaiVa

O le a fesoasoani le ofisa i le tufatufaina o pepa o faamatalaga i faigafaiVa-le-talafeagai aemaise ai o le faatinoina lea o suesuega ma moliaga o tagata ua faamaonia lona faatinoina o nei faigafaiVa i le faamasinoga a le Malo o Samoa.

7.2 IA FAASAINA LE TOE LAFOAI O LAPISI I LE SAMI MA LE MATAFAGA

Otootoga

O lapisi lafoai i le sami ma le matafaga e avea ma ala e faamanualia ai pe lavevea ai aao o le aufaifaiva. E le o se vaaiga matagofie o loo iai le matafaga ma le siosiomaga o le gataifale i le taimi nei, ma ua avea ma tulaga e faaitiitia ai tagata tafafao mai e afea le afioaga. E le gata i lea o le faaleagaina ai o le siosiomaga o le gataifale ma faatamaia ai o nofoaga mo meaola o le sami.

Fuafuaga faataatitia a le afioaga

O le a faamalosi e le afioaga le faasaina ai ona toe lafoai lapisi i le matafaga ma le sami ae saunia ni galuega mo le afioaga atoa e faamama ai lapisi, e pei o le fausiaina o fatalapisi po o le eliina o se lua e lafoai i ai.

Tulafono

Ua matua faasaina ona toe lafoai lapisi ma otaota e pei o pepa iila, uamea, atigi apa ma soo se ituaiga lapisi lava e ono aafia ai le siosiomaga o le gataifale.

Faasalaga

Mo tagata o le afioaga e solia lenei tulafono, o le a faasalaina i le \$50.00
O tagata mai isi afioaga o le a molia i le Tulafono Laititi a le afioaga e faasaina ai le lafoai o lapisi i le gataifale ma le matafaga.

Fuafuaga faataatitia a le ofisa

O faamatalaga eseese e faatatau i aafiaga o le gataifale ma ona tamaoiga o le a fesoasoani atu iai le ofisa e ao-tauna ai le afioaga i le taua o le teumaluina o lapisi ma otaota i nofoaga talafeagai.

7.3 IA FAASAINA FAIGAFAIVA MAI ISI AFIOAGA

Otootoga

Ua maitauina le toatele o tagata mai isi afioaga ua latou fagotaina gataifale o le afioaga o Fasitoo-Tai. Ua le gata i lea, ua latou faatamaia foi le gataifale i ni auala le talafeagai ma ua utiuti ai le tamaoiga e maua mai aloalo o lo o faalagolago iai le afioaga.

Fuafuaga faataatitia a le afioaga

Ua i ai se fuafuaga a le afioaga o le a faia se tulafono e faasaina ai tagata mai isi afioaga ona fagotaina o latou gataifale.

Tulafono

Ua matua faasaina lava tagata mai isi afioaga ona toe fagotaina gataifale o Fasitoo-Tai. Afai o le a le utagia mai lenei tulafono, o le a molia loa i le tulafono a le malo.

Faasalaga

O i latou uma o le a solia lenei tulafono o le a molia loa i le Tulafono a le Malo.

Fuafuaga faataatitia a le ofisa

O le a lagolagosua le ofisa i le suesueina ma le faatinoina o moliaga o le ua solitulafono i le faamasinoga a le Malo o Samoa.

7.4 IA ILOILOINA LE SAOGALEMU O OGASAMI O SAMOA MAI MEATAU FAANIUKILIA

Otootoga

O meatau faaniukilia ma kasa oona o loo lafoai i le gataifale ua mautinao le aafia ai o le siosiomaga o i'a. figota ma isi meaola o le alititai. E le gata i lea, ao le afiana ai foi o le soifua maloloina o tagata lautele. Ua i ai le talitonuga e le na o Samoa le atunuu ua aafia ai.

Fuafuaga faataatitia a le Afioga

Ua faalia mai e le Komiti o meatau faaniukilia o se tasi mafuaaga ua aafia ai le tamaoaiga o le gataifale i i'a ma figota. Ua talosagaina e le Komiti le Ofisa o Faigafaiva ia fautuaina le malo ina ia faatauaina le tetee atu i meatau faaniukilia ua afaina ai ogasami o Samoa ma le Pasefika i Saute.

Fuafuaga faataatitia a le Ofisa o Faigafaiva

O le a lagolagoina e le Ofisa o Faigafaiva lena fuafuaga e pei ona taua i luga.

7.5 IA AOINA MAI UTA ALAMEA MA FAATAMAIA AI.

Otootoga

O le alamea o se meaola o le ituaiga o le aveau ma e nofo i luga o le aau. O lena meaola e na te aiina meaola ninii ua taua o POLIPE o loo tutupu mai ai amu. A o'o ina faateleina le alamea o le a faapena ona latou faatamaiaina se vaega tele o le aau ma avea ai o se tulaga pagatia. O le a aafia ai le tele o meaola o loo faalagolago i le aau mo nofoaga ma meaai. E le mafai ona faa-umatia le alamea i le vaevaeina o lona tino i le sami aua e mafai e nei itu tino ona faatupuina mai ai nisi alamea fou.

E pau le auala e mafai ona tapeina ai lena meaola o le aoina mai lea i uta i le pau matu e faamagoina ai pe tanuina foi. E mafai ona faaogaina lena meaola o se faalelei eleele mo faatoaga ma mea totô.

Fuafuaga faataatitia a le afioga

Ua faailoa mai e le afioga o le alamea o se tasi lea o mafuaaga o le pe o le amu o le gataifale. E aafia ai foi le soifua o tagata faifaiva ma ua fautuaina ai e le komiti faufautua ina ia faatinoina le aoina i uta mo le faatamaiaina o lena meaola faalafua.

Fautuaga

Ua fautuaina e le komiti faufautua o le aoina mai i uta o le alamea, o le a faatinoina lava lea e tagatanuu o le afioaga. O le faatinoina o lenei fuafuaga o le a aoina tai-ono masina alamea ma aumai i le pau-matu e faatamaia ai ma faaogaina ai mo le faalelei eleele.

Fuafuaga faataatitia a le ofisa

E leai se polokalame a le Malo ua fuafuaina e totogi ai le faatamaiaina o le alamea vagana ai ni fautuaga e fesoasoani atu ai le ofisa i auala talafeagai e tineia lenei meaola faalafua e ala atu i Pepa o faamatalaga ua maea ona saunia.

7.6 IA FAASAINA ONA TOE FAALEAGAINA/TAINA TOGATOGO**Otootoga**

O togatogo o se tasi lenei o vaega ua tele sona sao i le gataifale mo le toe faatupuina o nisi o i'a ma figota. O le taua o le faasaoina o togatogo ona o nisi meaola ninii o le gataifale ua avea lea nofoaga ma vaega e sulufai i ai mai o latou fili, a'o nisi i'a ma figota ua avea togatogo ma nafooga e fanafanau ai. A tanumia pe taina i lalo ma faafeagaina togatogo o lona uiga o le a faaitiitia i'a ma figota mo tupulaga o le lumanai.

Fuafuaga faataatitia a le afioaga

Ua ioeina e le komiti le tatau ona faamalosi le aasaoina o le togatogo ona o le fia faasaoina pea o i'a ma figota ma isi meaola o loo avea lea vaega ma nofoaga e fanafanau ai. O le faasaoina o lenei togatogo o le a faamamaluina e le Pule Mamalu Alii ma Faipule o Fasitoo-Tai.

Tulafono

Ua matua faasaina ona toe taina i lalo ma faatamaia togatogo o lo'o ola i totonu o lenei afioaga.

Faasalaga

So'o se tasi o le afioaga o le a solia lenei tulafono o le a faasalaina i le \$100.00. O tagata i fafo atu o le afioaga o le a molia sao i le Tulafono a le Malo.

Fuafuaga faataatitia a le ofisa

O le a fesoasoani le vaega o Faigafaiva i le moliaina o se tasi e solia lenei tulafono aemaise lava mo tagata mai i isi afioaga e faa-faigata ona faasalaina i le malosiaga o pulega faa-le-nuu.

O le a fesoasoani le Ofisa i le tuuina atu lea o ni pepa o faamatalaga e faatatau i le taua ma le aoga o le Togatogo e faamalamalama atili ai lenei mataupu.

7.7 IA FAASAINA UPEGA MA TILI MATANINII.

Otootoga

O le faaaogaina o upega ma tili mataninii ua maitauina le tele o i'a laiti ua faatamaia ai. Ua i ai le talitonuga o le a oo atu i se tulaga faaletonu i'a maua pe a faaaauaina pea nei ituaiga faigafaiva. O le a oo ina faaitiitia i'a ma figota e mafai ona oo atu lo latou lapopoa e maua ai le avanoa e fanafanau ma tautuufua ai.

Fuafuaga faataatitia a le afioaga

Ua faailoa mai e le komiti o le faaaogaina o upega ma tili mataninii, o se tasi lea o mafuaaga ua faaitiitia ai i'a maua i le gataifale. O lea ua aiaia ai loa se tulafono ina ia faasaina ai upega ma tili mataninii ona toe faaaogaina i fagotaga i le gataifale o le afioaga. Ua faapea foi ona faaalua mai e le afioaga lo latou matua lagolagoina o le Tulafono Faatonutonu o Faigafaiva a le Malo ua i ai nei mo le faatapulaaina o mataupega ma tili.

Fautuaga

Ua fautuaina e le Pule Mamalu a Alii ma Faipule atoa ai ma le Komiti mamalu o le afioaga ina ia lagolagoina le tulafono o upega ma tili mataninii ua pasia e le Malo.

Faasalaga

O soo se tagata o le afio'aga e solia lenei tulafono o le a faasalaina i le \$150.00 Mo tagata mai isi afioaga o le a molia ma faasalaina i le tulafono faatonutonu o faigafaiva a le Malo o Samoa.

Fuafuaga faataatitia a le ofisa o Faigafaiva

O le lagolagosua mai a le ofisa o faigafaiva e ala i lana polokalame fesoasoani, o le tuuina atu lea o pepa o faamatalaga e saga faamautuina ai lenei tulafono.

7.8. OGASAMI FAASAOINA

Otootoga

Sa faaalua e le afioaga, o le vave faatupulaia o le tamaoaiga ua tataua ona avea se vaega o le gataifale ma vaega faasao, e vave ai ona toe faatupulaia le faitauaofai o ia ma figota i le gataifale. O lenei vaega faasao o le a faasaoina ai amu, aau faapea foi ma i'a ma figota ina ia mafai ona maua e nei meaola le avanoa e tautuufua ma fanafanau ai.

O le autu taua lava, o le a avea lenei faasao ma :

- punaaga o i'a ma figota ae le gata i lea o le a,
- tuuavanoa lea mo le toe faaleleia o le siosiomaga o le gataifale.

O le a fanafanau ma tautuufua i'a ma figota o loo aumau i le vaega faasaoina ma tafea atu o latou fua fanau ma faatupuina ai, nisi meaola fou i nofoaga ua le maua ai ni ia ma figota. O le a le pine ona manuia ai i tatou ae faapea foi tupulaga o le lumanai.

Fuafuaga faata'atitia a le afioaga

O le a filifilia e le afioaga se vaega o le gataifale e faatinoina ai le vaega faasaoina. O le a latou fausiaina foi se tulafono e faasaina ai ni faigafaiva ona faatinoina i lea vaega. O le afioaga foi latou te mataituina ma faamalosia tulafono a le afioaga.

Tulafono

Ua matua faasaina lava soo se tagata ona toe faatinoina soo se ituaiga faigafaiva, pe savalia foi totonu o lenei faasao.

Faasalaga

O le solia o lenei tulafono e soo se tagata o le afioaga o le a faasalaina i le \$500. O tagata mai isi afioaga o le a molia sao ma faasalaina i le tulafono laiti o faigafaiva a le afioaga o Fasitoo-Tai.

Fuafuaga Faataatitia a le Ofisa

O le a fesoasoani le ofisa i le faatinoina o le iloiloga o le tulaga talafeagai o le gataifale mo se vaega faasaoina. E le gata i lea a o le tuuina atu o fautuaga ma faamatalaga mo le tausiga, pulea ma le vaaia o le vaega faasaoina o le gataifale o le afioaga. E fesoasoani atu foi le ofisa i le tapenaina o tulafono e puipuia ai le vaega faasaoina.

7.9. IA FAASALALAUINA TULAFONO A LE AFIOAGA**Otootoga**

Na fautuaina e le komiti Faufautua mo le Vaaia ma le Pulea tatau o i'a ma figota o le Gataifale le faasalalauina o tulafono a le nuu ua faamoemoe ma faaagaga i le pupuiga o le siosiomaga o le gataifale ma ona tamaoaiga ma faigafaiva.

Fautuaga

O faasalalauiga i leitia o le a gafa le ama Alii ma Faipule. O le Komiti Faufautua mo le Vaaia Lelei o I'a ma Figota o le a gafa lea ma le faamaopopoina aemaise le tapenaga o faasalalauiga e faatatau i tulafono e puipuia ai le siosiomaga o le gataifale ma le vaaia lelei o i'a ma figota.

Autu o le Faasalaga: **Puipuiga o le Gataifale o Fasitoo-Tai**

Taimi Fautuaina

O faasalalauiga uma e ao ona faamaopoopoina pe a maea ona faamaonia uma tulafono ua faatatauina ma faaagaga i pulega o le siosiomaga o le gataifale ma le vaaia lelei o i'a ma figota.

7.10. IA FAASAINA TU'IGA MA FAAMO'A MA SAEUGA

Otootoga

O tu'iga ma faamo'a ua matauina ma le toto'a e le afioaga le matua faaleagaina ai o le gataifale. o ituaiga faigafaiva inei e faigofie ai ona maua ai i'a ma figota peitai e ogaoga ma matautia ona aafiaga. O lea ua tasi ai le finagalo o alii ma faipule ina ia faasaina loa ona toe faatinoina i le gataifale o Fasitoo-Tai.

Fuafuaga Faataatitia a le Afioaga.

Ua i ai le fuafuaga a le afioaga o le a faamalasia ma faamamalu loa lenei fuafuaga ua faataatia mo le faasaina o tui'ga ma faamo'a ma lagolagoina Tulafono Laiti o Faigafaiva.

Tulafono

Ua matua faasaina ona toe faatinoina ni tu'iga ma faamo'a i le gataifale o Fasitoo-Tai.

Faasalaga

O tagata o le afioaga o le a solia lenei tulafono o le a faasalaina i le \$300.00, o tagata mai isi afioaga o le a molia i le Tulafono a le Malo.

Fuafuaga Faataatitia a le Ofisa

O le a fesoasoani le Ofisa mo le avea o lenei tulafono ma Tulafono Laiti (By Laws) ma o le a faia foi ni aoaoga i le taua o le faasaina o tu'iga ma faamo'a.

7.11. IA FAASAO MA FAATELEINA AMU.

Otootoga

O le puipuia ma le faasaoina o amu, o se tasi lea o auala e mafai ai ona tutupu ma ola lelei ai amu. O le faateleina o amu, o se itu lelei lea mo i'a ma figota aemaise meaola ninii o le gataifale o loo faalagolago mo meaaai ma o latou nofoaga. O le faia o se ogasami faasaoina ma le taofia o faigafaiva le talafeagai o nisi ia o fuafuaga tatau ma le talafeagai mo le faateleina o amu.

Fuafuaga Faataatitia a le Afioaga

Ua faaalua e le Komiti, o le faia o se ogasami faasaoina o se auala lea ua mautinoa ua mafai ona faasao ma faateleina ai amu. O lenei faasao o le a faatinoina e le Komiti faapea ai ma le Pule Mamalu a Alii ma Faipule. O le vaaia lelei ma le mataituina o lenei faasao o le a feagai lea ma tagatanuu o le afioaga.

Fuafuaga Faataatitia

O le a fesoasoani le Ofisa i le faamalamalamaina o itu lelei o le faasaoina o amu. O le a galulue faatasi le Ofisa o Faigafaiva ma le afioaga i le faatinoina o se suesuega i se vaega o le gataifale o le a faaagaga mo le faasaoina.

7.12. TUFAINA ATU MA LE FAA-FAATOAGAINA O I'A MA FIGOTA

O le tufaina atu, ua faatatau lea i le aumaia o ni figota poo ni i'a mai se isi atunuu ma tufa atu e faaola i se ogasami ua talafeagai. O le faa-faatoagaina ua faatatau lea i le faaolaina o figota i se nofoaga ua saunia.

O le tufaina atu ma faa-faatoagaina, o nisi nei o atinae mo le faatupuina o figota aua le fofoga taumafa o le afioaga. O nei auala faa-atinae e moomia ai lava le galulue filiga ma le faamaoni o le afioaga ina ia ausia se taunuuga lelei.

Sa faaalua mai e vaega taitasi, o nisi o figota sa maua i lo latou gataifale ua tauau ina mou atu. O nisi o nei figota ua masalomia ua le toe maua i le taimi nei. O lea ua latou faatalosagaina ai nisi o figota e faa-f'atoagaina i lo latou gataifale.

Fuafuaga faataatitia a le afioaga

Ua i ai le fuafuaga a le afioaga o le a latou mataituina ma vaايا lelei figota o le a tufaina atu mo le faa-faatoagaina i aloalo aemaise o le mautinoa lelei o lo latou saogalemu mai le faaleagaina.

Fuafuaga faataatitia a le ofisa

O le a fesoasoani le ofisa i le tufaina atu lea o figota e faa-faatoagaina i aloalo ma iloiloaina le tulaga talafeagai o le gataifale mo nei figota. O le a saunia foi ni aoaoga e faamalamalamaina ai le olaga faa-natura o nei figota aemaise o le mataituina ma le tausia lelei.

7.13. IA FAASAINA LE LAUESEINA O LE ONEONE.

Otootoga

O le faateleina o apitagalu ma matafaga mai le fetafeaiga o au ma galu malolosi ua faapogai mai lea ina ua tele se vaega o oneone o le matafaga poo le gataifale ua asuina. Ua avea foi le auina o le oneone ma mafuaaga ua faaitiitia ai ona toe ofaga le tele o meaola o loo aumau i nei vaega o le gataifale ona o le tulaga gefu o le sami.

Fuafuaga Faaitiitia a le Afioaga.

Na faaalua e le komiti o le laueseina o le oneone mai le sami o se tasi lea o mafuaaga o le faaitiitia o ia ma figota aemaise ai le faaleagaina o le siosiomaga o le gataifale. O lea ua fausia ai se manatu ina ia taofia le faia o lea tulaga se i vagana se pemita faatagaina mai i lenei afioaga o Fasitoo-Tai e a ala lea i se tusi aloaia e mafai ai ona faia lea tulaga i gataifale o lenei afioaga.

Tulafono

Ua matua faasaina lava so o se tagata ona toe eliina le oneone o lenei afioaga se i vagana ua i ai se pemita o se tusi aloaia mai le afioaga e mafai ai ona faatinoina lea vaega.

Faasalaga

O i latou uma o le a le usitaia lenei faasalaga o le a molia loa i le tulafono a le Vaega o Faigafaiva.

Fuafuaga Faataatitia a le Ofisa o Faigafaiva

O le a fesoasoani le ofisa o Faigafaiva i le Afioaga i le faamautuina lea o lenei tulafono faatasi ai ma le tufaina atu o ni pepa o faamatalaga e faamalamalama atili ai mo le silafia e le mamalu o le atunuu.

7.14. Ia unaia faigafaiva i Tuaau ma Aoaoga mo Faigafaiva.

Otootoga

E mafai ona faaleleia le tamaoaiga o i'a ma figota maua i aloalo, aau ma vaega o le gataifale ua faaleagaina. Pe afai ae faaitiitia le fagotaina o nei vaega o le gataifale, ia poo le unaia o tulaga tau faigafaiva i tuaau ma aau mamao.

O se tasi o auala e faaleleia ai le tamaoaiga o le gataifale, o le fagotaina lea o ogasami o le gataifale e lei fagotaina lava aemaise o tuaau.

Ua i ai le talitonuga i le Komiti Faufautua mo le Vaai Lelei o i'a ma figota e ao ona unaia ma faamalosi faigafaiva i tuaau ma aau mamao ina ia tuumamaina ai le fagotaina o i'a ma figota o le aau ma le aloalo. Ua le gata foi i leae o le a mafai ai ona toe faatupulaia ma faaleleia ai le tamaoaiga o le tele o vaega o le gataifale ua faaleagaina. Talu ai ona o le tele o nuu e leai ni vaa e talafeagai mo fagotaga i tuaau o lea ua taumafai ai le Ofisa o Faigafaiva e sailia ni vaa talafeagai mo le faamoemoe.

Fuafuaga Faataatitia a le Afioaga

Ia talosagaina le Ofisa o Faigafaiva ina ia faatinoina se aoaoga i auala tau faigafaiva e aoaoina ai le au tautai o se nuu ma ia faatautaia e se Alii Ofisa o Faigafaiva ua i ai se tomai faapitoa tau faigafaiva.

Fuafuaga Faataatitia a le Ofisa o Faigafaiva

O le a iloiloaina e le Ofisa o Faigafaiva manaoga tau i auala tau faigafaiva e ao ona fesoasoani ai e aoaoina ai le mamalu o le autautai o le afioaga. O itu taua o le a aafia i nei aoaoga e pei o le teuina ma le vaaia lelei o i'a, saogalemu i luga o le sami, tausiga o afi vaa, faaasuina o i'a, ma isi lava mataupu taua.

FAAMATALAGA FAAOPOOPO: Vaa mo Fagotaga i Tuā'au:

O le leai o ni vaa talafeagai mo fagotaga i tuaau o le ala lea ua avea ma vaegase i le unaia o faigafaiva i tuaau. E leai se vaa fagota e i le va o le alia ma paopao, ma o se vaa i lea va ua talitonuina o le a talafeagai mo faigafaiva i tuaau. I sailiiliga a le Ofisa o Faigafaiva i se vaa talafeagai, ua filifilia ai le vaa e i le va o le 14ft – 16ft ma o lona tau a ititi ifo o le \$10,000 tala tuufaatasi i ai ma lona afi. O lenei ituaiga vaa e mafai ona faaauvaaina e ni tagata se toalua pe toatolu foi ma e mafai ona faaogaina lenei vaa i faigafaiva i tuaau. O le a fesoasoani le Ofisa o Faigafaiva i aiga taitasi i mea tau nonoga tupe aua le faatauina o le vaa ma le afi. O le a faia foi

ni aoaoga mo le saogalemu i luga o le sami, teuina ma le vaaia lelei o i'a, tausiga o vaa atoa ai ma le faiga o mea fagota.

7.15. Mana o Talosaga

Otootoga

O talosaga ma talitonuga tuufaatasi faa-le-lotu, o se tasi lea o faamoemoega ua talitonuina lona taua aua le puipuia ma le faasaogalemuina o le siosiomaga o le gataifale ma ona tamaoaiga.

Fuafuaga faataatitia a le afioaga

O le sao taua o le aufailotu, o le unaia lea ma faamalosiua i tagatanuu ina ia latou faatauaina le puipuia ma le faasaoina o le siosiomaga o le gataifale ma ona tamaoaiga. E taua tele lenei fuafuaga e tuufaatasia ai finagalo o tagata, ina ia galulue faatasi e foia faafitauli o loo aliae mai i le siosiomaga o le gataifale.

Ua lagolagoina foi e le komiti lenei fautuaga ma fautuaina ai le mamalu o le afioaga, o le a latou faamamaluina faatasi lea aso faailogaina mo tatalo ma anapogi a le Malo i tausaga taitasi. O ia tatalo ma anapogi o le a talosia ai laufanua, gataifale aemaise o tagatanuu o le afioaga i Samoa nei ma atunuu i fafo.

Fuafuaga Faataatitia a le Ofisa

O le a mafai ona tuuina atu ni fesoasoani mai le ofisa mo le mamalu o le aufailotu e ala i pepa o faamatalaga ma tautalaga ina ia fesoasoani i le tapenaina o a latou lauga ma aoaoga mo le puipuia ma le faasaoina o le siosiomaga o le gataifale ma ona tamaoaiga.

7.16. Talosaga a le afioaga

O nei talosaga sa mafai ona tuuina mai e sui o le afioaga sa auai i fonotaga ma le ofisa i taimi o faatalatalanoaga i vaega e tolu. O talosaga uma foi la ua tuuina mai sa faamautuina e le Komiti i le latou fonotaga ma le ofisa. Pe a talafeagai, o nei talosaga o le a mafai ona iloiloaina e le Ofisa o Faigafaiva mo le faataunuuna pe a maea le taliaina o lenei tusi e le pule mamalu a ali'i ma faipule i le fono tele. O talosaga uma sa tuuina mai o loo faailoa atu i lalo:

- (a). Faisua
- (e). Ogasami Faasao mo ia ma Figota.
- (i). Tilapia ma se Faatanoa vai
- (o). Vaa fagota
- (u). Aoaoga i mea tau Faigafaiva

8. MALILIEGA

Ua i ai le maliliega o le a galulue soosoo tauau uma vaega i le puipuiga o le siosiomaga o le gataifale mo le manuia o tagatanuu o le afioaga aemaise o tupulaga o le lumanai. O lea manuia e mafai ona maua pe a faatinoina uma fuafuaga faataatitia ua tamauina i le fuafuaga tatau mo le pulea ma le vaaia lelei o

Ituaiga Faigafaiva.	Isi Taumafa o le Sami	Taimi faaalu i le 10 tausaga ua Tuanai
--------------------------------	------------------------------	---------------------------------------------------

i'a ma figota o le afioaga.

9. Toe iloiloina o lenei Fuafuaga Tatau

Otootoga

O le toe iloiloina o lenei fuafuaga tatau, e sailia ai le agai i luma ma lona toe suesueina ina ia faailoa le taua ma le aoga o lenei polokalame i totonu o nuu ma afioaga, aemaise o ni auiliiliga maumaututu i le tulai mai o galuega fai a le afioaga ma le ofisa i le faataunuuina o fuafuaga faataatitia e pei ona taua i luga. O lenei foi iloiloga e lipotia ai le taulaumanuia ma ni fa'aletonu o le polokalame talu ona faavaeina i le afioaga.

Fuafuaga faataatitia a le afioaga ma le ofisa o faigafaiva.

Ua iai le maliliega a le Komiti faufautua a le afioaga ma le ofisa o faigafaiva o le a toe auiliiliina lenei fuafuaga tatau pe a maea le ono (6) masina talu ona pasia lenei tusi i le fono mulimuli. O le a toe feutagai ai le komiti ma le ofisa i se aso o le a atofaina pe a atoa le ono (6) masina.

10. UPU MULIMULI

O le auai o le afioaga o Fasitoo-Tai i le polokalame mo le pulea ma le vaaia lelei o i'a ma figota ua mautinoa le manuia o le afioaga i ni tausaga o i luma. O le manuia ma le alualu i luma o lenei polokalame e faalagolago tele i le galulue faatasi o le afioaga; i le pule mamalu a alii ma faipule, komiti a tina, aumaga aemaise o le malo e tau ala mai le ofisa o Faigafaiva i le faatinoina o fuafuaga faataatitia ua maea soalaupule i le tele o fonotaga ma faatalatalanoaga sa faia.

O lenei polokalame o se galuega e umi se taimi e faatali ai ni tali faaaliali ma sona lelei, o lea e taua ai mo le silafia e tagatanuu o le afioaga. O i latou o le a talisapaia ma aea i nei manuia o tupulaga o le lumanai o le afioaga. O lea ua ae ai se tofa i le afioaga e faia se polokalame faapenei a le malo e fesoasoani ai e toe tapue mai le sosia o le tamaoaiga o le gataifale o le afioaga ua tauau ina mou atu.

Matau	Tuitui (ato)	10 minute
Afaafaloloa	Faisua	Tau le maua
Fao-tuitui	Ula	2 itula
Seuseuga	Pa'a (kuku)	2 itula
Fagapusi	Sea	1 itula

11. ITUAIGA O FAIGAFaIVA E FAATINO I ASO UMA.

I'A MA FIGOTA

Ituaiga I'a.	Ituaiga Faigafaiva	Taimi Faaalu.	
		Taimi nei.	10 tausaga.
1. Mataeleele	Mata/upega	2-3 itula	30-50 minute
2. Pauulu	Mata	2-3 itula	30-50 minute
3. Manini	Mata aau	2-3 itula	30-50 minute
4. Fuga	Mata aau	2-3 itula	30-50 minute
5. Taulaia	Upega	2-3 itula	30-50 minute
Ituaiga Figota.			
1. Limu fuafua	Fai limu	1 itula	30 minute
2. Sea	Tuisea	1 itula	30 minute
3. Gau	Tui-gau	1 itula	30 minute

Vaega Taua o le Siosiomaga mo Faigafaiva

Vaega	Vaega taua (sikuea mita)	
	Taimi nei	Sefulu Tausaga ua te'a
Togaotogo	250	350
Amu	100-200	400-500
Vaovao o le sami	200-300	50-100

12. SUI O LE AFIOAGA SA AUAI I FAATALATALANOAGA I VAEGA E TOLU

Matai :

Afamasaga Faamatala (faipule)	Valuniu Letane	Moe Sialeipata
Lefeau Taetafe	Masagamaleao P	Anamaiutu Siala
Valuniu Poutoa (pulenuu)	Lau Ueni	Afamasaga Fatu
Tafeamaalii T	Saolotoga Samoa	Mati Iese
Sila Poutoa	Moa Sanele	Letoa Lemi
Faasina L	Niulevaea Falepule	Lio Fialii
Valuniu Fiaaiti	Lapa Lale	Tago Taele
Afemaleta Lavasii	Niulevaea Sopepa	Valuniu Tuufanua
Faumuina Felise	Tafili Fareti	Ligaliga Elisala
Valuniu Poliko	Tanuvasa S	Valuniu Levale
Lio Paulo	Saveaalii Pisia	Ale Pelesese

Aumaga :

Lui Finau	Fulumoa Sufiau	Sulu Saolotoga
Mu Tua	Ioane Mati	Vesi Savilu
Lusi Valu	Alapati Valu	Futu Niko
Samoa Tuifao	Pa'a Pa'a	Ulu Mose
Misi Telea	Fiapule Sila	

Komiti Tina :

Inosia Iosefa	Itagia Iosefa	Sulu Saolotoga
Lauola Moesialeipata	Asia Seve	Ruta Pula
Milo Pulemata	Autalaga Lua	Pepe Fagataele
Po Lefeausauila	Mareta Alapati	Faomuina Falaula

13. KOMITI O LE FAASAO

Komiti Matai:	Valuniu Seve Tuufanua (Pulenuu)	Ligaliga Elisara
	Lefeau Taetafe	Sila Vaipouli
	Lio Maka	Manu Pelesara
	Mati Lomeo	Mati Saunoa
	Ligaliga Esekia	Valuniu Valusaga
	Mati Farao	Lau Nuulua
	Liugata Amataga	
Komiti Aumaga:	Mu Seumanutafa	Samoa Tafeamaalii
	Matia Simona	Mose Sauiluma
		Etuale Lau
		Lotomau Ale
Komiti Tina:	Luka Pule	Luaipou Masaga
	Milo Lio	Mama Lio
	Luaipou Masaga	Po Taetafe
		Lesina Maeli
		Vi Ligaliga

14. SUI O LE VAEGA O FAIGAFAIVA

Ueta Faasili	Faatonu Lagolago o Faigafaiva
Dr Michael King	Taitai Polokalame Fesoasoani Ausetalia
Siamupini Iosefa	Sui Ofisa Sinia Faigafaiva (Upolu)
Nichole Hosrsman	Tamaitai Ofisa Faigafaiva (Upolu)
Apulu Fonoti	Alii Ofisa mo le Vafealoai ma nuu ma afioaga
Autalavou Taua	Alii Ofisa Faigafaiva
Voli Sooaemalelagi	Alii Ofisa Lagolago Faigafaiva
Tauvae Sua	Alii Ofisa Lagolago
Kaisara Liu	Alii Ofisa Lagolago
Susau Siolo	Tamaitai Ofisa Lagolago Faigafaiva
Iulia Kelekolio	Tamaitai Ofisa Lagolago Faigafaiva (Savaii)